



---

**IZVJEŠTAJ O ODRŽANOJ TREĆOJ REGIONALNOJ KONFERENCIJI  
PARLAMENTARNIH TIJELA NADLEŽNIH ZA LJUDSKA I MANJINSKA PRAVA  
I RAVNOPRAVNOST SPOLOVA POD NAZIVOM: „ULOGA KOMISIJA U  
PARLAMENTARNOM NADZORU U OBLASTI LJUDSKIH PRAVA“**

**Sarajevo, 23. i 24. novembra 2015. godine**

U organizaciji Zajednicke komisije za ljudska prava Parlamentarne skupštine Bosne i Hercegovine u Parlamentarnoj skupštini Bosne i Hercegovine, je 23. i 24. novembra 2015., održana Treća regionalna konferencija parlamentarnih tijela nadležnih za ljudska prava, na kojoj su predstavnici komisija/odbora za ljudska prava iz parlamenata osam zemalja jugoistočne Evrope potvrdili svoju opredijeljenost da preuzmu obavezu parlamentarnog nadzora u oblasti ljudskih prava i obavezu usmjeravanja aktivnosti parlamenata kao osiguranju i promociji uživanja ljudskih prava.

Konferenciju, koja je realizirana u saradnji i uz podršku Misije OSCE-a u BiH, otvorio je zamjenik predsjedavajućeg Predstavničkog doma Parlamentarne skupštine BiH Mladen Bosić, koji je uputio pozdrave prisutnim predstavnicima komisija/odbora za ljudska prava parlamenata Albanije, Crne Gore, Hrvatske, Kosova, Makedonije, Slovenije, Srbije, Bosne i Hercegovine, kao i predstavnicima parlamenata Republike Srpske i Federacije Bosne i Hercegovine.

Prisutnima su se obratili i predsjedavajući Zajedničke komisije za ljudska prava PSBiH Borislav Bojic i zamjenik šefa Misije OSCE-a u BiH Aleksandar Cuplugin, koji su pozdravili praksu održavanja ovakvih konferencija i naglasili značaj regionalne razmjene mišljenja i iskustava predstavnika komisija/odbora koje se bave parlamentarnim nadzorom u oblasti ljudskih prava.

Tokom konferencije raspravljalo se o iskustvima i naučenim lekcijama u zemljama regiona u vezi sa parlamentarnim nadzorom nad institucijama ljudskih prava, kao i o ulozi komisija/odbora u parlamentarnom nadzoru. U okviru ove teme bilo je riječi o tome kako

parlamenti mogu doprinijeti boljem uspjehu izvršenja politika i zakona iz oblasti ljudskih prava, kao i o tome kako poboljšati parlamentarni nadzor nad izvršnom vlasti i institucijama iz oblasti ljudskih prava, kao i o ulozi nevladinih organizacija i aktivista civilnog društva u zaštiti ljudskih prava.

Posebna tema rasprave ove konferencije bila je posvećena antidiskriminacijskim zakonima, odnosno novinama u pravnim i sudskim sistemima regije u vezi s ovim zakonima.

U usvojenim zaključcima učesnici konferencije preuzeli su obavezu usmjeravanja parlamenata u oblasti ratificiranja međunarodnih sporazuma u oblasti ljudskih prava, usvajanja zakona koji omogućavaju provođenje međunarodnih standarda u domaćem pravu, osiguravanju provođenja međunarodnih standarda u domaćem pravu i promocije obaveza iz oblasti ljudskih prava.

Vlade država regiona pozvane su da izrade strategije odnosno akcione planove za ljudska prava kako bi se osigurao koordiniran pristup u promociji i osiguranju poštovanja ljudskih prava i da o tome redovno izvještavaju komisije/odbore za ljudska prava parlamenata. Vlade su, također, pozvane da bez odlaganja izvrše procjenu usklađenosti zakona koji uređuju oblast diskriminacije sa međunarodnim standardima i standardima Evropske unije u ovoj oblasti, kao i da utvrde strategije odnosno akcione planove za prevenciju i borbu protiv diskriminacije.

Učesnici konferencije konstatirali su značaj i uspjeh regionalne saradnje parlamentarnih tijela nadležnih za ljudska i manjinska prava i ravnopravnost spolova, te potvrdili svoju predanost da preduzmu nove korake u obavezivanju svih tijela vlasti kako bi se postigao značajniji napredak u promociji ljudskih prava putem šire i održive saradnje i preuzimanja zajedničke odgovornosti.

Mi, učesnici Treće regionalne konferencije parlamentarnih tijela nadležnih za ljudska i manjinska prava i ravnopravnost polova, koja je uz podršku Misije OSCE-a u Bosni i Hercegovini održana u Sarajevu, 23. i 24. novembra 2015. godine, pod nazivom „Uloga komisija u parlamentarnom nadzoru u oblasti ljudskih prava“ utvrđuju sljedeće:

### **ZAKLJUČCI TREĆE REGIONALNE KONFERENCIJE PARLAMENTARNIH TIJELA NADLEŽNIH ZA LJUDSKA I MANJINSKA PRAVA I RAVNOPRAVNOST POLOVA**

Smatrajući da je promocija i zaštita ljudskih prava prioritetni zadatak svih institucija zakonodavne, izvršne i pravosudne vlasti, potvrđujemo svoju opredjeljenost da u okviru svojih parlamenata preuzimamo obavezu parlamentarnog nadzora u oblasti ljudskih prava i obavezu usmjeravanja aktivnosti parlamenata ka osiguravanju i promociji uživanja ljudskih prava;

Konstatirajući da je međunarodno pravo ljudskih prava prepoznalo ulogu parlamenata u praćenju međunarodnih dokumenata u oblasti ljudskih prava, a posebno u pogledu izrade Univerzalnog godišnjeg pregleda u vezi sa Rezolucijom Vijeća sigurnosti Ujedinjenih naroda broj A/HRC/26/L.21 od 23. juna 2014. godine, pozivamo sve nadležne institucije vlasti da pravovremeno izvještavaju parlamente o napretku koji je ostvaren u primjeni preuzetnih obaveza;

Prepoznavajući značaj aktivnog djelovanja u oblasti ljudskih prava, preuzimamo obavezu usmjeravanja parlamenata u oblasti ratificiranja međunarodnih sporazuma u oblasti ljudskih prava, usvajanja zakona koji omogućuju provođenje međunarodnih standarda u domaćem pravu, osiguravanja provođenja međunarodnih standarda u domaćem pravu i promociju obaveza iz oblasti ljudskih prava;

Potvrđujući opredjeljenost za provođenjem Beogradskih principa o saradnji između nacionalnih institucija za ljudska prava i parlamenta (Beograd, Srbija 22. i 23. februar 2012.), potvrđujemo svoju opredjeljenost da osiguramo efikasnu saradnju i podršku sa nacionalnim institucijama za ljudska prava;

Prepoznavajući značaj aktivnog djelovanja u oblasti poštivanja, zaštite i osiguravanja ljudskih prava, prepoznamo ulogu i značaj djelovanja institucija izvršne vlasti u ovoj oblasti, a posebno u pogledu osiguravanja preduslova za uživanje ljudskih prava u skladu sa ustavima utvrđenom podjelom nadležnosti između zakonodavne i izvršne vlasti;

Podsjećajući na Bečku deklaraciju i plan za akciju, koji su usvojeni na Svjetskoj konferenciji o ljudskim pravima Beč, Austrija 14. - 25. juna, 1993. i potvrđeni na 48. zasjedanju Opće skupštine Ujedinjenih naroda, 1993. godine (rezolucija 48/121), pozivamo vlade da izrade strategije odnosno akcione planove za ljudska prava, kako bi se osigura koordiniran i usmjeren pristup u promociji i osiguravanju poštivanja ljudskih prava, kao i da o tome redovno izvještavaju ova tijela;

Naglašavajući da postoji potreba dugoročnog djelovanja kako bi sve osobe i grupe u društvu u potpunosti de facto uživale ljudska prava, pozivamo vlade da utvrde kvantitativne i kvalitativne pokazatelje (indikatore) za praćenje stanja i napretka u oblasti međunarodnih standarda u oblasti ljudskih prava kako bi osigurale pretpostavke za vjerodostojno izvještavanje;

Imajući na umu da diskriminacija predstavlja prijetnju za uživanje svih ljudskih prava različitih grupa, pozivamo vlade da bez odlaganja izvrše procjenu usklađenosti zakona koji uređuju oblast diskriminacije sa međunarodnim i EU standardima u ovoj oblasti;

Naglašavajući da postoji potreba dugoročnog djelovanja kako bi se uspostavio cjelovit sistem zaštite od diskriminacije i društva koje uvažava različitosti, zahtjevamo od vlada da utvrde strategije odnosno akcione planove za prevenciju i borbu protiv diskriminacije sa pregledom zakonodavstva koje je potrebno uskladiti sa principima nediskriminacije;

Konstatirajući sa zadovoljstvom značaj i uspjeh regionalne saradnje parlamentarnih tijela nadležnih za ljudska i manjinska prava i ravnopravnost polova, potvrđujemo svoju predanost da poduzmemo nove korake u obavezivanju svih tijela vlasti kako bi se postigao značajniji napredak u promicanju ljudskih prava putem šire i održivije saradnje i preuzimanja zajedničke odgovornosti.

U Sarajevu, 24. novembra 2015. godine